

San Pablo Tesalónicalachi caque

ereca jun pila

Caque fiqui: Tesalónica wa pueblo jominue. Lamari quelote jominue. Junni jun pueblobi chumin Jesucristobe penenaminlari problema tan jominlanue. Uyanlari yalaca padeseisa carinaminlanue Jesucristobe penenaminla jonun tenchi. Jinsi Jesucristo numasi jamochi nechi manpatano jonunca palaque tenca camin jominlanue. Weyanlari Jesucristo moora manpatano jonari ¿ti quichun trabajaquino jun? tito, lan chumin jominlanue. Junni Páblori Corinto pueblobi chuto meraca jominue ya problema talaraeque. Junca meráto, in pila chutenuce yalaca mantucarichun. Wata 50 tsansite in pila quinie.

1 ¹La Pablo in pilaca nulachi erechun quinayoe Tesalónicabi chuminlachi. Nulari Miya Jesucristochi tsachi bolon joto, yabe Apa Diosibe man junni jolajoe. La Páblori Silvánobe Timotéobe in pilaca erelaquinayoe. Apa Diosibe Miya Jesucristobe nulaca laquirato pansi chularasa carisa tenjalaquee yape wepanatuto chularasa.

Tesalónicabi chuminla seque nenaminla jonunca

²Nula jeralelachi tenchi numasitiya Diosibe acrädchenimin jolajoyoe. Diosibe rocainato, nulachi tenchinan perocaimin jolajoyoe. ³Nulanan chiquilachi Miya Jesucristoca tennato, duque seque quiminla joe. Diosica laquirato, yaca meráno tenfeminla joe. Peleituto Jesucristoca quereito ya manpatano fecári yaca meralarae. Junni tsanla jonunca tenca cato, chiquilachi Apa Diosibe rocaimin jolajoyoe.

⁴⁻⁵Junni acola, soquila, Diosi nulaca laquirae. Junni chiquilari nulaca Diosichi sen fiquica micarinato, fiquichisiri micarilaquiyoe. Diosichi Tencanan pepasa carinasa, tsara merántsangue micarilaquiyoe. Nula Jesube cayailaichunaeque tenca canato micarilaquiyoe. Tsanque miilaiyoe Diosi nulaca wenteca jonunca.

Nulanán miralarae chiquilarí nulachite niyaque nenalaranunca. Junni chiquila nulachi tenchi seque nenanán,⁶ nulanán chiquila cuwenta iliae. Junto nulari Diosichi fiquica meráchun duque padeseilaie. Tsanhinasatiya, Diosichi Tenca nulaca ayudaie yape ya fiquica son tito meralaquisa. Tsanque seque meránato, chiquila cuwenta, Miya Jesucristo cuwenta, nenamin iliae.⁷ Junni uyanlanan nulaca micato, yalanan Jesucristobe seque nenanunca fécarí miilainue. Macedonia tobi, Acaya tobi jerale Jesucristobe cayaica junla tsanque jera micalaquinue.⁸ Junni nula Macedonia tobi chuminla jonana, jerale nulachi tobi, junsí Acaya tobinan, Miya Jesuca pacá fiqui mera joe. Junni junbisiri mera itoe; jerale totenan nulaca mera joe nula Diosibe cayaicala joeque. Junni chiquilarí yalabe nulaca natíya pano itolajoye.⁹⁻¹⁰ Chiquila pachinasanan, yalarí chiquilabe caquenan paminla joe. Nulaca itsantiminla joe: Nula chiquilaca seque facarito, epe diosi joe tinunlaca purato, tsa Diosibe cayaicala joe timinlae. Amana tsarasica sonnamin Diosibe mantaito nenaminla joe timinlae. Yachi Nao Jesuca meralarae timinlae yape jamochi nechi manpatasa. Ya Jesús puyacaca Diosi mansoncarinue. Yari se larimin joe yape Diosi seitonlaca casticaquinato chiquilacari casticaquitusa. Junni nulaca meráminla tsanque chiquilabe cuenta manpolariminla joe.

Pablo tesalónicalabe beco manpato, tsanque micarimin jomanyoe tinunca

2 ¹Acola, soquila, nula miralaranae chiquila nulachica jato, niyaque micariminla jonunca. Epele micarituminlayoe. ²Diosichi sen fiquicari micariminlayoe. Filipos pueblobi seitonlari chiquilaca jelepochique tenfelaie. Nula miralaranae chiquila junbi duque padeseilaieque. Junni tsanque padeseinasatiya, Diosi chiquilaca sonba tenca suwae yape nulacanan yachi sen fiquica micarilaquisa. ³Epele micarilaquitiyo; seiton suwachique micaritulajoyoe; encanato micarituminlayoe. ⁴Tsarásica pato micarimin jolajoye. Diosi chiquilaca se tito, chiquilachi mantá cuwae yape yachi sen fiquica micarilaquisa. Jun tenchi tsanque micariminla joyoe. Tsachilari sen joe tinun fiquica micarituminlayoe. Diosi sen joe tinun fiquicari micariminlayoe. Ya chiquilachi tencaca miimin joe. ⁵Nulanán chiquilaca miralarae. Uyan tsachila amico ichiquerí seitonlaca sen joe timinla joe. Yalarí cala cachiquerí micariminla joe. Chiquilarí tsanque seitonquerí micarituminlayoe. Diosi chiquilaca mirae tsanlaquitununca. ⁶Cróstochi mantá tanla joto, chiquilaca respeta lalaia mantano podeino jominla joinhie. Tsan jotonan, chiquila tsachilaca tsanque mantatulajoyoe. Nin nulacanan, nin uyanlacanan tsanque mantatuminlayoe. ⁷Aman ayan yachi tsotsoca nalalaca seque cuidainun cuwenta, chiquila nulaca tsanque uraraque cuidailaiyoe. ⁸Nulaca duque laquirato, Diosichi sen

fiquica micaritobi, jansi chiquilachi tencacanan nulachi epe cuwano munarano jominla joinhie.

⁹Nulabe sen jominlayoe. Mantenhilaide! Nulaca Diosichi sen fiquica micarinato, nulaca ticanantiya panhalaquitioye. Ti munaranuncatiya cachique chiquilanan quepen, malon trabajaquimin jominlayoe. Duque tenfemin jominlayoe yape nulari chiquilachi ticanantiya cuwano itolajosa. ¹⁰Nula Jesucristobe cayaica junla chiquilaca miralarae. Diosinan chiquilaca mirae. Yachi joto, nulabe sen jominlayoe. Monantiya culpa quituntsanque nenaminlayoe. ¹¹Nula miralarae chiquila nulachi apa cuwenta jominlaeque. Nula manca mancaca apa cuwenta payin, sonba tenca suwan, urara micarin, quimin jominlayoe. ¹²Diosi nulaca yabe cayaisa ticae yape ya mantananun tsachi bolonbi pewilaisa, yape ya cuwentanan sen jolajosa. Junni yari nulabe duque sen jonan, nulari Diosichi sen tsachila jonola joe. Junni chiquilari tsanke seque nenalarasa payimin jominlayoe.

¹³Junni nula chiquilachi fiquica meráto quereilaie. ¿Ya fiqui Diosichi fiqui joco? Junni nulari jun fiquica tsachilachi fiqui itoe tito, Diosichi fiquie tito, quereinilaie. Jun tenchi Diosibe numasitiya acradeseiminla joyoe. Jun fiquica meráto quereito, seilainae. ¹⁴Junto acola, soquila, nulanan Jesucristochi tsachila joto padeseilaie Judea tobi chuminla cuwenta. Yalari Jesucristobe cayaito, Diosichi bolon tsachila iliae nula cuwenta. Junni nulachi to tsachila nulabe seiton jonun cuwenta, israelítala yalabenan jun tsanquenan jominlae.

¹⁵⁻¹⁶Israelítalari seitonque nenalarae. Miya Jesuca toten, israelítala talanan Diosichi mantate paminlaca toten, chiquilabe duque seiton jun, Diosi munaratununca quin, quiminla joe. Chiquilaca pa jolajoe yape israelita itonlaca micarilaquitusa. Israelita itonlaca se larisa carituchique, chiquilaca tsanke pasuwalaquinæ. Tsanquinato, piyanle tsachilachi contra patilainæ. Duque culpa ilainae. Junni Diosi duque wantainaminnan, ina michi culpa icaca casticaquichunæ.

Pablo Tesalónicabi chuminlaca manquirano munarayoe tinunca

¹⁷Junni acola, soquila, amana nulaca numari fecári manquiratuto laquiliayoe. Juntonan, nulaca manquiratutonan, nulaca duque tenhiminla joyoe. Tsanhinatonan, nulaca chiquilachi cale fécarí duque manquirano munaralarayoe. ¹⁸Juntonan nulachi minu jino muquinasanan, natiya jino capodeilaitiyo. La Pablo duque neca jichique tenfeyoe. Junni jino tenfenaminlaca Satanari chiquilaca porequiniquee. ¹⁹Junni meralaquede! Chiquilachi Miya Jesucristo manpatano mate yachi cale wirurasa, nulacanan junte pewiruralaras tenjae. Chiquila junca meralarayoe. Nulaca junte manquiranato, duque son tito manquiralaqueyanae chiquila nulaca ayudaicalayoe tito. ²⁰Nulaca tenca

canato, Diosica duque seque pato, son timinlayoe. Jun tenchiri nulaca quirabi jino muquilaquee.

3 ¹Junni nula tenchi nantari laquiino muquetuca jominhe. Junni chiquilari nulachica jino podeituto, Atenas pueblobi puraito, ²aco Timotéoca ereca jominlayoe. Yari Cróstoca paca sen fiquica micarimin joto, Diosibe seque mantaimin joe. Nulaca sonba tenca suwasa yaca ereca jominlayoe yape nula fe quereilaisa. Yari nulaca payibi jica jominhe ³yape nula padeseinatonan, monantiya Jesuca quereino peleilaitusa. Nulari miralarae padeseinola joyoeque. ⁴Nulabe cachuminnan palaquiyoe jera Jesucrístobe penenaminla padeseinola joyoeque. Chiquila tsanque paca josanan, jun tsanquenan patilaiyoeque miralaranae. ⁵Tsan josanan yucan seiton quisa carichique tenfemin joe. Junni la wepanato tenca canamanyoe pansile ya nulaca peleisa carinueque. Tsanque peleica jomanpari, chiquila nulaca epenan micarica jono jominla joinhie. Junni nulaca miituto wepanato, Timotéoca ereyoe yape nulaca niyaque quereiminla jonunca manmiibi jisa.

⁶Junni amanari pansi manjoyoe. Timoteo chiquilachica manjato cuenta quee. Nula Diosica duque tennato, nula tala laquiracaalaquito, seque chularae tie. Chiquilacanan laquirato mantenhiminla joe tie. Chiquila manquirachi tica cuwentanan, nulanan chiquilaca manquirachi latinæ tie. ⁷Junni chiquilari duque padeseinatonan, jun fiquica merasi son tilatiyoe. Nula duque seque quereilainaueque meráto, chiquila duque pansi jolajoyoe. ⁸Nula Miya Jesube seque nenanari, chiquilari chiquilachi tencabi son timinlayoe. ⁹Nulachi tenchi Diosibe duque acradeseinola joyoe. Nulachi tenchi Diosichi cale duque son tilatinayoe. Juncanan Diosibe tsanquenan duque acradeseinola joyoe. ¹⁰Quepen, malon, Diosibe duque rocaiminla joyoe nulaca cale quirachun. Nula caquereitununca quereisa carino muquilaquee.

¹¹Chiquilachi Apa Diosibe, jansi chiquilachi Miya Jesúbenan chiquilaca ayudaideque rocailainayoe nulachica jichun. ¹²Chiquilari nulaca duque laquiralarayoe. Junto Miya Diosibe rocailainayoe yape nula talanan jun tsanquenan fécarí laquiracaalaquisa. Nula talanan fécarí laquiracaato, piyanlelacanan jun tsanquenan laquiralarasa tenjae. ¹³Chiquilachi Miya Jesús manpatano mate yabe yachi jerale sen tsachilabe parejo manpatalaichunae. Junni chiquilachi Apa Diosibe rocailainayoe yape nulanan jun mate yachi cale tsara sen jolajosa. Sonban tenca suwasa rocailainayoe yape sen jolajosa, monantiya nulaca culpa quitusa.

Diosica pansi josa carito nenalaranunca

4 ¹⁻²Junni acola, soquila, nulaca numa micaricalayoe niyaque seque nenano jonunca yape Diosi nulaca miito son josa. Nulanan jun fiquica meráto nenalaranae. Junnasanan, Miya Jesuchi mantate nulaca

payilaquinayoe yape fécarí seque nenalarasa. Nulabe rocailainayoe tsanque nenalarana! tito. ³Diosi nulaca nantanancari fe seque nenalarasa munarae. Seque nenato, uyan sonalabe o uyan unilalabe nosa seitonque nenasa munaratue. ⁴Jeralela tencachique sonaca seque mantanola joe. Sona canato, Diosibe mantaito seque canola joe. ⁵Diosibe penenatuminlari sona cato, delanocasiri tenca cato sona caminiae. Nulari tsanquira itolajona! ⁶Monantiya yachi accolaca seiton quito encanatulajona! Chiquila nulaca wari payicalayoe tsanque nenaminlacari Diosi casticaquichunaeque. ⁷Diosi chiquilaca cato, seitonque nenalarasa catucae; seque nenalarasa caya joe yape Diosichi tsachila nenalarasa. ⁸In fiquica merátuchi timinlari fiquicasiri merátuchi timin itolajochunae; Diosicanan merátuchi timinla jochunae. Yari yachi Tencaca nulachibi wisa carinan, yaca merátuchi timinla jochunae.

⁹Acola, soquila, nula laquiracaanola joyoeque miralaranae. Diosi nulaca junca micarie. Junto juncari pila quituntsan joe. ¹⁰Junni nulari laquiraminla joda. Jerale Macedóniabi chuminlaca laquiralarae Jesucristobe penenaminla tala. Tsanla josanan payilaquinayoe yape fécarí laquirano tenfelaisa. ¹¹Fécarí seque chuchique tenfelaina! Uyanlachi cosabi tede potulajona! Tedechi trabajaquilaquina! Wari mantacalayoe yape nula tsanque nenalarasa. ¹²Junni tsanque nenalaranari, nulachi tinantiya falta itochunae. Junni uyan tsachilanan nulaca respetailaichunae.

Miya Jesucristo niya quiraque manpatano jonunca

¹³Acola, soquila, puyaca junlaca miralarasa tenjae. Jesucristobe penenatuminla manca puyanari, yachi familiala, yachi amicola duque laquiiminla joe tsa mansohnino itoeque tenca cato. Aman nulari seque miraminla joto, yala cuwenta laquiilaituchunae. ¹⁴Chiquila quereilaiyoe Jesús puyatonan mansohnica joeque. Junca quereimin joto, man fiquiman quereiminlayoe: Diosi Jesuca manpatasa carinato, Jesube penenaminlaca yabe pejasa carichunae. Jesús mansohnica joeque quereimin jotori, jun fiquicanan quereiminlayoe. ¹⁵Junsi man fiquiman pachinayoe: Miya Jesús manpatano mate sonnan cajominlari puyaca junlaca caquenan lono itolajochunae. Miya Jesuchi mantate tsanlatinayoe. ¹⁶Itsanque jochunae: Sonba mantá mera jochunae. Junsi mantá tan anjeli oticaya fiqui mera jochunae. Junsi Diosichi tutu mera jochunae. Tsanquinunsi Miya patsa jamochi nechi manpataniichunae. Junni Cróstobe penenamin puyaca junlari casale mansohnilaichunae. ¹⁷Tsanhinunsile casonnaminlanan yalabe pelayailaichunae. Jeralelaca cato, poyoca tanjichunae yape Miya Jesube poyote tulailaisa. Junto aman Miya Jesube numatotiya chuto polecaichunae. ¹⁸Junni nula tala in fiquica tenca cato, seque payicaato chularana! laqui itolajochun.

5 ¹Acola, soquila, Jesucristo numasi manpatano jonunca nulachi pila quituntsan joe. ²Nulanan numa miralarae monantiya yari numasi manpatano jonunca miitolajoeque. Aman meralaquede! Monantiya miituminla joe numasi tarinpunla janola jonunca. Junni Jesucristo manpatano ma jun tsanquenan jochunae. Yaca quiraituchunae latinasanan manquirachunae. ³Jana na pun sonalaca tenhilaide! Yala moora sen jominannan quiyaiminla joe. Jun tsanquenan tsachila wepanatuto pansi chularayoe latinasanan, moora to yucapiyarino ma patichunae. Natiya se lono podeilaituchunae.

⁴Nula mantimini yala cuwenta itolajoe. Nulachi tenca nemen cuwenta seiton itolajoe. Tarinlaca cuwenta wepanatuntsan jochunae. ⁵⁻⁷Nulari Diosichi tsente nenato, tenca nemen nenatuminla joe. Nula tenca calaquede! Catsominlari quepen catsolaimanhe. Winan iminlari quepen winan ilaimanhe. Junni Jesucristobe penenatuminlachi tenca jun tsanquenan jalajoe. Yalachi tenca catsoto, winan ica cuwenta jalajoe. Chiquilari tsanke nенalaratuntsan joe. Son cuwenta nenanola joyoe. Quepen nенaminla cuwenta itolajoyoe; malon nенamin cuwenta tsente nенaminlayoe. ⁸Tsan jotori tenca tan nенantsan joe.

Soldadola cuwenta jalajoichunae. Soldadola poloquin camisa, casco polarachunae isaichun. Tsan punlari pa jominlaca jeleralaratuchunae. Junni chiquilari jun soldadola cuwenta jalajoyoe. Diosica tennato, tsachilaca laquirato nenanola joyoe. Tsanke nenatori, poloquin camisa pun cuwenta jalajoichunae. Chiquilaca Diosi se larichunaequeri tenca cato nенantsan joe. Tsanke nenatori, yucanca jelenasa nенacaituchunae casco pun cuwenta joto. ⁹Diosi chiquilaca wentenato, casticaquichunni wentetue. Chiquilachi Miya Jesucristobe se lolaisa wentee. ¹⁰Ya chiquilachi tenchi puyaе yape casonnatonan, o puyaе jotonan, yabe sonnalarasa. ¹¹Junni nula tala sonban tenca suwacaalaquina! Tsanlaquinato, fécari tsanlaquina!

Pablo Diosichi tsachilaca debi payinunca

¹²Acola, soquila, Miya Jesucristochi tsachila tala, weyan weyanlari mantá tanla joe. Yalari nulaca cuidainato payiminla joe. Aman nulabe rocailainayoe yalaca respetailainaque. ¹³Nulaca seque cuidailainan, yalaca laquirato respetailaina! Jinsi nula tala pacaatuto nенalarana!

¹⁴Acola, nula tala itsanke nенalarana! Lan punlaca payilaquina! Pele tencalacanan sonba tenca suwalaquina! Cumana tenca junlacanan ayudailaina! Jinsi tsachila niyan tilatinasatiya, pailaituna! ¹⁵Seiton quinaminlaca nulanan beconan seiton quilaquituna! Numasitiya uyanlabe sen jochique tenfelaina! Nula tala laquiracaato nенalarana! Uyan jeralelabenan sen jalajona! ¹⁶Numasitiya son tilatina! ¹⁷Jinsi numasitiya Diosibe rocailaina! ¹⁸Nulaca niyan quilaquinasatiya, Diosibe

acradeseilaina! Nulaca Jesucrístico tsachila jolajonan, Diosi tsanque seque nenalarasa munarae.

¹⁹Diosichi Tenca nulaca ticatiya quisa carichi tinari, yaca tina porelaquituna! ²⁰Diosichi mantate pacá jun fiquica epe fiqui joe tilatituna! ²¹Tsan jotongan, jerale fiquica sen joe titulajona! Seque meráto miintsan joe seiton fiqui jonunca o sen fiqui jonunca. Junni sen fiquicari meralaquina! ²²Titiya seitonari, meralaquituna!

²³Diosi chiquilaca pansi chusa carimin joe yape wepanatuto chularasa. Junni yabe rocainayoe yape nulaca jera se suwasa. Nulaca cuidaisa rocainayoe yape nulachi tencanan, nulachi pucanan, sen jolajosa. Se suwasa rocainayoe yape Jesucristo manpatano mate culpa iton jolajosa. ²⁴Diosi epele patumin joe. Nulaca yachi tsachila josa tito, yanan nulaca jera se suwachunae.

²⁵Acola, soquila, nulanan chiquilachi tenchinan Diosibe perocailaina!

²⁶Acola, soquila, Diosichi tsachila jolajoto, jeralelabe caforole mo tito saludaicaalaquina! ²⁷Jesucrístico cale nulaca mantanayoe yape in pilaca jerale Jesucrístico tsachilaca merásá carilaquisa.

²⁸Chiquilachi Miya Jesucristo nulaca laquirasa rocainayoe. Tsanqueri joe.